



# Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

**TAPAK 7**

UP nung tensa majungbaji police nem tashi agütsüba ajanga lir: Akhilesh

**TAPAK 8**

US-i tenokdangba agienba sülen Iran-i nuclear inyakyim melenshitsü: Zarif

**VOL. XVIII NO. 127 (ADOK 127) DIMAPUR**

**KÜPTOKNÜ (SATURDAY) TSÜKLAI (FEBRUARY) 20, 2021 ₹ 5.00**

## COVID-19 Nagaland: 97.84% taneptsünguogo; NISUNG 20 ANEPALUDAR

**Kohima, February 19 (TYO):** Hokolbarnü Nagaland nung nisung ka dak danga COVID-19 aliba meputet aser nisung 9 taneptsü angu. Iba ajanga tang anepaludar nisung 20 dang kümogo.

"Tanü shinga dak-a COVID-19 aliba meputet. Külen, Kohima nungi nisung 9 taneptsü angu" ta Health & Family Welfare Minister, S Pangnyu Phom-i ashi.

"Nagaland nung nisung 12,191 dak COVID-19 putetba nungi nisung 11,928 taneptsü nguogo aser taneptsü angubaji 97.84% lir" ta Health & Family Welfare Director, Dr Denis Hangsing-i metetdaksü.

Nagaland nung nisung 91 tashi süogosa nisung 10bo tanga timtem ajanga asü. Külen, nisung 152 tashi

tanga state temi ogo ta paisa ashi.

Tang Kohima nung nisung 18 aser Dimapur nung nisung 2 anepaludar. Dimapur nung nisung ka dak shirangba yimya tera lir saka nisung 19 dakbo shirangba yimya kecha mali, ta Dr Hangsing-isa ashi.

Taneptsü angurtem: Dimapur (6,338), Kohima (3,790), Mon (594), Peren (506), Tuensang (246), Mokokchung (183), Zunheboto (139), Phek (47), Kiphire (40), Wokha (35) aser Longleng (10).

"Nagaland nung COVID-19 alitsü akok ta temolung melemba sample 1,28,898 tendangogo. RT-PCR ajanga sample 74,572, TrueNat ajanga sample 37,296 aser Rapid Antigen Test ajanga sample 17,030 tendang" ta Dr Hangsing-isa ashi.

## CSOs aser tamangbayimsü lennirtem den vaccine metetpelatsü

**Dimapur, February 19 (TYO):** Department of Health and Family Welfare-i Civil Service Organisations aser Tamangba yimsü lennirtem atema COVID-19 vaccine indang orientation

workshop agitsü.

Iba workshop ya February 24, 2021 anepdang 11:00 ako nungi nikongdang 1:00 ako tashi Conference Hall, Directorate of Health & Family Welfare nung alitsü.

## ULFA (I)-i Quippo nung mapa inyaker 2 tepsettsü

**Guwahati, February 19 (Agencies):** ULFA (I)-i totzü company nung mapa inyaker nisung ana pua aliba taruba hopta tepsettsü ta Hokolbarnü metetdaksüogo.

"Totzü company Quippo nungi telangzüba kecha manguba agi onoki iba mapa inyaksü telemtetba agiogo" ta ULFA (I) publicity wing züngsem Rumel Asom-i email ka nung ashi.

December 21, 2020 nü ULFA (I)-i radio operator Ram Kumar aser drilling superintendent Pranab Kumar Gogoi na apu. Tena ya Arunachal Pradesh kübok Changlang district nung Kumchaikha hydrocarbon drilling site nungi apu.

Tena ya Myanmar nung tesem

kati anir anir oa lir.

"Quippo ketdangsürtemi February 16 aser February 19, 2021 tsüngda olemtepdang telangzüba kecha magütsü. Anungji onoki mapang lemsar Ram Kumar aser Pranab Kumar Gogoi na dak mapa inyaksü lemtetogo" ta ULFA (I)-i ashi.

Totzü company Quippo-i South East Asia nung mapa kecha meinyaksü tenokdangba agütsür, ta Paresch Baruah-i aniba ULFA (I)-isa metetdaksüogo.

"Onoki Quippo nung mapa inyakerter dang parnoki lemezüka aliba mapa kecha meinyaksü aser Oil India Limited (OIL) ketdangpurtem dang parnok atema mapa tasen meshitsü ayongzüker" ta ULFA (I)-isa email nung shia lir.

## Manipur nung journalist temi lungkak aitba anenogo

**Imphal, February 19 (Agencies):** Brihostibarnü Manipur nung journalist temi mapa meinyaki lungkak aitba anenba sülen Hokolbar nungi local news channels nung osang agütsü tenzüko.

Asüng, Honibar nungi Manipur nung osangkakettem angutsü.

Imphal nung aliba Press Club nung senden ka amendang journalist temi lungkak aitba anentsü telemtetba agia liasü.

All Manipur Working Journalists Union (AMWJU) aser Editors Guild Manipur-i sangdong balala nung lungkak aitba anenba osangtem

metetdaksü.

Yashi amenba senden nung AMWJU aser EGM teloktemi telok ka indang osangtem madoktsütsü telemtetba agi.

Manipur nung osangkaket 2 adokba media house ka nung grenade pokdaksüba sülen February 13 nungi state ajungalen journalist temi mapa meinyaki lungkak aityonga aru.

February 12, 2021 nü mejangjatetba nisung kari media house indang office nung grenades pokdaksü. Iba media house ajanga Meitei oshi nung Poknapham aser English oshi nung People's Chronicle osangkakettem adoker.

## Nagaland Assembly-i Rs 22,816.16 crore budget agizükogo



**Hokolbarnü Nagaland Legislative Assembly Speaker Sharingain Longkumer-i 13 buba NLA Assembly session tenetbuba tembang jembidang agiba noksa angur. (Kohima, February 19)**

**Kohima, February 19 (TYO):** Hokolbarnü Nagaland Assembly-i 2021-22 financial year atema Rs 22,816.61 crore budget agizükogo.

Brihostibarnü Chief Minister Neiphiu Rio-i Assembly nung Rs 2679.46 Crore deficit budget benoka liasü.

Tanü anogo piyong Budget atema olemtepdang Opposition NPF MLA tem- Amenba Yaden, Moatoshi Jamir aser Yitachu nungeri Fisheries aser Health & Family Welfare Department nung tim masüba inyakyimtem beshir ta shia sen ajemtsü onüktem benoka olemtepbaba sülen budget agizük.

Opposition MLA temi ashishitepbaba atema Chief Minister Rio aser Health & Family Welfare Minister, S Pangnyu Phom nati bangdak department tem den onük lemsateptü aser inyakyim metongshitsü ta nangzüker.

Iba sülen cut motions agien aser Speaker Sharingain Longkumer-i budget atema vote agitsü benoka voice vote ajanga agizüka ayu.

NLA-isa Nagaland Appropriation (No 4) Bill, 2021 agizük. Iba ajanga Peoples' Democratic Alliance (PDA) sorkari March 31, 2022 nung tembangba financial year atema Nagaland state consolidated fund nungi budget sen agizüksü tashi agütsür.

Maneni, Hokolbarnü NLA-isa The Nagaland Fiscal Responsibility and Budget Management (Amendment) Bill 2021 aser tanga appropriation bill 3 agizük.

Nagaland Appropriation (No.1) Bill, 2021 ajanga financial year 2012-13 nung sen talila endokba atema supplementary demands ama Consolidated Fund nungi Rs. 166.13 crore agizüksü temelaba agütsür.

Nagaland Appropriation (No.2) Bill, 2021-ia financial year 2013-14 nung sen talila endokba atema supplementary demands ama Consolidated Fund nungi Rs. 38.51 crore agizüksü temelaba agütsür.

Nagaland Appropriation (No.3) Bill, 2021 ajanga financial year 2021-21 nung supplementary demands ama Consolidated Fund nungi Rs.

5826.79 crore agizüksü temelaba agütsür.

Tanü Assembly nung Budget agizükba aser küm tasen atema financial aser non-financial committees tentetba osang metetdaksüba sülen NLA Speaker Sharingain Longkumer-i session tembang.

NLA Speaker-i Assembly züngsem ajaki shilem tajung agiba aser sorkari sentong aser asalentong balala yangluba nung yaritepbaba atema pelaba metetdaksü.

"Naga yimten tebilemtsü atema olemtepbaba aser iba session nung telemtetba agiba ajak ya kanga tongtipang lir aser item ya putiotsü nung teti bilemtettsü" ta paisa shisem.

"Leader of the House Neiphiu Rio aser Leader of Opposition T.R. Zeliang nati anir MLA ajak den 13 buba NLA Assembly session tenetbuba nung shilem agiba sorkar ketdangsür ajak dang pelar" ta Sharingain Longkumer-isa metetdaksü.

## SARFAESI Act repringshimba atema CNCCI-i pelar

**Dimapur, February 19 (TYO):** Nagaland state sorkar aser Nagaland Legislative Assembly nung züngsemtemi SARFAESI Act atema luden ka shimtsü molunga agizükba atema pelar ta Confederation of Nagaland Chamber of Commerce and Industry (CNCCI)-i metetdaksüogo.

Covid wara sülen rongsenkettsüng tia mejungi aliba

mapang ka nung asen lennirtemi iba telemtetba tajung agiba ya onsara tajung lir, ta CNCCI-i sangdong ka nung ashi.

SARFAESI Act ya 2002 küm Parliament nung agizük saka küm 20 tema süika Nagaland state nung iba Act mebenokba ajanga shishilembartem aser entrepreneur temi maongka mangur, ta CNCCI-isa ashi.

NLA-i iba tebilemtsü benoka agizükba atema tenüngsang agütsür aser kasa mapang sorkari tekaratiba nung luden ka tenteta mapa inyakdaksütsü mepishir. Nüngdakra iba Act atema NLA special session jazüka telemtetba agitsü akok, ta CNCCI General Secretary Dr. Seyevilie Mor aser Chairman Dr. Khekugha Muru nati sangdong nung ashi.

## UNLF-i taoba chairman Khundongbam Panmei anentsür

**Guwahati, February 19 (Agencies):** Manipur nung telungpur telok United National Liberation Front (UNLF)-i taoba chairman Khundongbam Panmei telok nungi züngdokogo.

February 15 nü UNLF-i iba telemtetba ya agi ta osang ajanga ashi. Pai tsükchir den yaritepbaba miim osang belenba aser lennirtem dak tai tongloksütsü merangba atema iba mapa ya inyak.

Manipur-Myanmar arrtsü

ansa GHQ Neina Shang nung UNLF special session alidang Panmei anentsütsü telemtetbaji agi.

Central Committee-i Special Fact Finding Committee ka nem Panmei-i inyakba bushisüngdangtsü atema mapa lemezüksü.

"Pa dak tai tongloksüba ajak shitak ta bushitet aser iba jagi February 15, 2021 nungi Panmei den tesentaktep kecha malitsü lemtetogo" ta UNLF

sangdong ka nung ashi.

Bangladesh nung UNLF founder chairman Rajkumar Meghen (Sanayaima) apu aser December 2010 nung pa Bihar nung apu ta shia India ket nung agütsü.

November 2019 nung pa Guwahati Jail nungi chioka liasü.

Pa chiokba ajanga Meghen-i India sorkar den olemtep tenzüksü akok ta bilema liasü saka tanü tashi ibaji meinyaki lir.

## Budget session sülen sorkari totzü jenjang reprangshitsü: Rio

**Kohima, Tsüklai/February 19 (TYO):** State sorkari tekeratiba nung petrol aser diesel jenjang reprangshitsü, ta Nagaland Chief Minister Neiphiu Rio-i Brehostibarnü ashi.

Kidanger state, Meghalaya nung tawa totzü jenjang ajemba osang sangdongba sülen Nagaland nung petrol aser diesel jenjang tali akumba indang asüngdangba langzüdang Rio-i ashiba agi, Assam nung election agitsü lir aser sorkari "political intension" nung petrol aser diesel jenjang ajemtsü sangdong.

Meghalaya ya Assam den arrtsüa lir asünung, jenjang nung

tetoktepba aliba agi parnokia jenjang ajemogo, ta pai ashi.

Rio-i ashiba agi, Assam nunga petrol jenjang ana lir, Guwahati nung petrol liter ka nung senpak 80.62 aser Bokajan nung senpak 82.89 lir.

Nagaland nung teti totzü jenjang ya kidanger state tem dang tajemba nung agütsür, aser Nagaland nung diesel aser petrol base rate ya Assam dang paise 50 aser Manipur dang paise 49 agi tajemba lir, ta pai ashi. Base rate ya medemdangra, danga state dang nungi yangi tajemba lir, ta pai ashi.

Iba atema state sorkari totzü agütsüba company tem dang

base rate nung Nagaland ya kechiba tali meshitsü, ta ashishitepogo, ta Rio-i ashi.

"Onoki iba ken o parnok den jembir aser budget session tembangba sülen state nung petrol aser diesel jenjang sorkari asadangshitsü," ta pai ashi.

Assam nung ama masü, Nagaland tesem ajunga nung petrol jenjang kasa lir, saka osangtem ajanga ashiba agi totzü jenjang ya district ka nungi district ka nung tetsünga ita lir. Dimapur nung Brehostibarnü petrol jenjang liter ka nung senpak 91.96 aser Kohima nung senpak 92.62 liasü aser Kiphire district nung senpak 94.98 liasü.

## Assembly session nung Annual Administrative report & bills benok

**Dimapur, Tsüklai/February 19 (TYO):** Thirteenth Nagaland Legislative Assembly Session 7buba indang anogo pongububa nung Chief Minister, Neiphiu Rio-i 2020-21 küm atema tsünglanglen agüja aliba department tem indang Annual Administrative Report benoka liasü: Department of Finance, Department of Justice and Law, Department of School Education, Personal & Administrative Reforms Department, Information and Public Relations Department, Department of Animal Husbandry & Veterinary Services, Department of Environment, Forest & Climate Change, Department of Legal Metrology & Consumer Protection, Department of Technical Education.

Paisa Nagaland Lokayukta, January 2020 nungi December 2020, State Finances Audit Report of the Comptroller & Auditor General of India for the year ended 31st March, 2019 (Report No. 1 of 2020), Finance Accounts (Vol-I & Vol-II) 2018-19 indang Second Annual Report benoka liasü.

Maneni Department of Power, 2020-21, Transport Department, 2020-21,

Department of Rural Development, 2020-21, Department of Social Welfare, 2020-21, Nagaland Public Works Department, Works & Housing, 2020-21, Department of Soil & Water Conservation 2020-21, Department of Geology & Mining, 2020-21 aser Department of Higher Education, 2020-21 indang Annual Administrative Report tema kasa mapang benok.

Chief Minister aser Minister in-charge of Finance, Neiphiu Rio ajanga Nagaland Fiscal Responsibility and Budget Management (Amendment) Bill aser Nagaland Appropriation (No.1, No. 2, No. 3) Bill 2021 benoka house nung iba item bill ya agizük.

Committee on Subordinate Legislation (2020-21) indang züngsem aser mendenpuba, Dr. Imtiwapang Aier-i Sixty Second and Sixty Third Report on the Nagaland Agricultural Produce Marketing (General) Rules, 2006 (62nd Report) and Nagaland State Biological Diversity Rules, 2012(63rd Report), Sixty-Fourth Report on Nagaland Information and Public Relations Service Rules, 2013, Sixty-Fifth Report on the Nagaland Government Printing

Press (Technical) Service Rules, 2015 indang osang agütsü.

Committee on Estimates (2020-21) indang züngsem aser mendenpuba, Pukhayi Sumi-i 141st Report on Action taken on the Observation/Recommendations contained in the 136th Report of the Committee on Estimates Pertaining to Technical Education Department (State Technical Scholarship & Minority Scholarship), 142nd Report on Action taken on the Observation/Recommendations contained in the 137th Report of the Committee on Estimates Pertaining to Public Health Engineering Department (Rural & Urban Water Supply), 143rd Report on Action taken on the Observation/Recommendations contained in the 139th Report of the Committee on Estimates Pertaining to the Transport Department (Motor Vehicles Department & Nagaland State Transport) indang osang agütsü.

2012-2013, 2013-2014 atema Regularisation of Excess Expenditure asoshi Supplementary Demands aser 2020-21 atema Supplementary Demand for Grants tem House nung agizüka liasü.



ATMA Mokochung organised training on Shiitake Mushroom cultivation for farmers hailing from Mokochung district at Kashiram Dimapur. Seen in the picture Dr.Sosang Longkumer the main resource person along with the interns of SASRD Medziphema and the farmers from Mokochung on 19th February 2021. ( DPRO Dimapur)



OFFICE OF THE  
**DIMAPUR AO BAPTIST AROGO**

DIMAPUR : 797112, NAGALAND

Email : daba@dabaarogo.org

## DABA OFFICE NUNGI SANGDONGER

Arogopurtem ajak dangi DABA Office ajanga Yisu Khrista temeim salem bener arutsür, aser asen arogo nüngdak kar yamai lemsateper.


- 1) Taküm asenok Tekülem sentep 17th January 2021 nung tenzüka joko hopta pungu agia aruogo, Tsüngremer teyari tulu asoshi Pa nem tenüngsang agütsür. Taoba Deobar tashi tekülem sentep telok ana lemdanger agia aruogo saka lenmang tesademba lapoktsü nung, DABA Board of Deacon ajanga tang aruya aliba Deobar (ie. 21st Feb. 2021) nungi tekülem khen dang agitsü aser akhi ama 10:30 am nungi tenzüksü lemtetba metetdaksür. Lemteta aliba ama tekülem SOP shitak kanga kümdanga amshitsü.
- 2) DABA Youth Ministry asoshi 2021 March mezüing Deobar nungi, DABA Tekülem SOP ajak shitak amshia fellowship ajak nung tekülem tenzüksü.
- 3) 2021 March ita nungi DABA nung Kiyimba Kulizüing agirtemi reception hall amshinüra, Arogo SOP-i melaba ama amshitsü melar, iba asoshi arogo office den arua tongtepa jembitsü metetdaksür.

Asen Tsüngrem tsüngdang kecha tamakoktsü mali. Anungji, tamajungba tia kecha majurutsü saka tensa tajungba dang kümdakjang ta ajaki sarasadema atatsü mepishir. Tsüngremi arogopur ajak kümzüka yujangma.

**Rev. I. Wati**

**Pastor**

**Dimapur Ao Baptist Arogo**



ABAM, Literature & Education Children Ministry-i Group Publishing India den lokteper February 18 & 19, 2021 anogotem Dimapur Ao Baptist Arogo (DABA) nung VBS Launching cum teachers Training Program ayonga agiogo. Iba sentong ya 'Mapang tajung alangzükan' Efesa 5:16 nung ajemdaker agi aser Ao Arogo balala nungi tesayur 72 den tanga shilem agirtem arua aden. Sentong nung Bangalore aser Manipur nungi tetangshi tesayurtem- Mr. Nischal, Mr. Jason aser Mr. Sesei nungertemi tesayuba balala agütsüogo. DABA Christian Education (CEM) aser ABAM nung lennirtemi kanga junga sentong ahaayangba nung tadenertem kanga temoatsü ngua liasü. Iba VBS Course tasenba ajanga tanurtem aika tanüla nung tajangzükan asütsü ta bilema lapoktsüogo. (Dimapur, February 19)

## Kohima DPDB kübok VAC ajanga Kigwema nung training agütsü

**Dimapur, Tsüklai/February 19 (TYO):** Kohima District Planning and Development Board kübok Southern Angami-1 A/C atema tentetba Village Adoption Committee (VAC) ajanga February 19, 2021 nü Village Council Hall, Kigwema nung anogo ka baking aser Anti-Rabies Vaccination camp kaja liasü.

Yimtsüng nung lanurtem aser SHGs tem ajangzüksü asoshi Cakes aser Cookies (amtsük) yangluba training ya agüja liasü. Iba training ya

District Youth Resources Officer, Chubarenla Longchar ketdangsuba kübok ayongzükan, kong Peecee bakers nungi Pelong Konyak shisalen sayur ama liasü.

Kasa mapang CVO, Rokozo Dolie ajanga anti-rabies Vaccination camp sentong ya ayongzüka liasü. VAC Convenor, Ruopfukuotou Noudi aser SDO (C), Jakhama nati sentong nung adener dang iba sentong ayongzükan nükjidong indang metetadakja liasü.

# Congress-i CAA anema 'Gamosa' aika bendener

**Guwahati, February 19 (Agencies):** Assam nung Congress-i Assembly Elections atema Citizenship Amendment Act (CAA) nung ajemdaker nüboyimer.

Ajisüaka, Congress-i election nung CAA benshiba atema Assam BJP-i aitsür.

Congress-i election nung CAA amshiba ya aibelen tulu ka lir kechiyong Assam nungeri state nung CAA atema mebilemer ta Minister Himanta Biswa Sarma-i ashi.

"Assam nung shingaia CAA indang mejembir" ta pai ashi.

Ajisüaka, Congress-i Assam Minister Sarma aser BJP tai kümtsüogo kechiyong Congress-i tenzükba sentong nung nisung aikati shilem agir.

Assam nungeri CAA anema züluba 'Gamocha' lakh 50 tashi tenlar. Congress-i Assam nung sorkar kümra Anti-CAA martyrs' memorial ka yanglutsü ta nangzüka lir.

Hokolbarnü Congress-i state ajungalen nungi 'gamocha' bendenba mapa tenzükogo aser tanü

nisung aikati iba nungshilemagiogo. Taoba Assam Minister Rakibul Hussain-i Sam Stafford'er kidangi ao. Arishi küm 17 tain Sam Stafford ya CAA anema lungkak aitdang police-i khaset.

Iba mapang par tsüraburtemi 'Anti-CAA Martyrs' Memorial' atema 'gamocha' ka tenla.

"Sam Stafford tepsetba atema onoki temeten aginür. Onoki kodanga CAA magizüktü" ta par tsüraburtemi 'gamocha' nung zülur agütsü.

"Ozü jabasoji kiralongrar mesüra ozüng alema inyaker ka masü. Shibai pa tepsetsü atema temeten agütsü? Ni pa atema temeten aginür" ta tetsü Mamoni Stafford-i ashi.

"Tasütaiter aikati CAA anema raraogo len anidang taküm bendanga agütsüogo. Taküm bendanga agütsür tanubosangji arishi küm 17 tain Sam Stafford liasü. Par kibong nungi mezüngbuba anti-CAA Gamosa nguogo" ta Assam Congress-i metetdaksü.

Maneni, Assam nungi

Educationist Dr Khargeswar Bhuyan aser Social Activist Shivananda Kakati natia CAA anema noktakba pusema 'Gamosa' tem tenla agütsüogo.

"Nenoki onok lemsadaksütsü merang, saka onoki meyiper raratsü longjemdaksü. Assam nung CAA magizüker" ta Assam Congress Tir Ripun Bora-ia ashi.

"BJP-i kanga dang kümdanga election atema nüboyimba sentong nung CAA metetshir aser Assembly elections nung iba ya mejembir," ta Lok Sabha MP Gaurav Gogoi-ia ashi.

Maneni, Lok Sabha MP Pradyut Bordoloi-ia Lakhimpur nung anti-CAA 'gamocha' bendena senzüogo.

Assam nungi Bengali Hindu Binita Hore-ia Tinsukia nung CLP leader Debabrata Saikia nem 'gamocha' agütsü.

"Ni Bengali Hindu ka lir aser CAA mapa kuma meinyakdaksünür" ta social worker Sushanta Dutta-ia 'gamocha' nung zülur agütsü.

**Piles Anepaluba** - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Athjma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang

**Kabiraj H. Umar Chesam contact no. 7627998690 Address: Near Nagaland Gate, Lahorijan K/A Assam,** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 9 AM - 5 PM**

**Yours sincerely - Angkhol, Add: Naga United Village, Dimapur**



## PM Modi-i Assam nung lung azüngtsüba manener

**Guwahati, February 19 (Agencies):** Assam nung Assembly elections agitsü lia Prime Minister Narendra Modi-i lung aika azünga senzür.

Brihostibarnü Prime Minister Modi-i Brahmaputra nung apu ana yanglutsü lung azüngtsüba sülen March 2, 2021 nü central government schemes aika atema lung azüngtsütsü.

Modi-i February 27 nü Kerala, February 28 nü West Bengal, March 1 nü Tamil Nadu aser March 2 nü Assam nung mapatong aika atema lung azüngtsütsü.

Külen, Union Agriculture

Minister aser BJP Assam's election in-charge Narendra Singh Tomar-i Hokolbarnü Assembly elections atema core committee senden ka menogo.

Iba senden nung Assam chief minister Sarbananda Sonowal, state BJP president Ranjeet Dass, DoNER Minister Jitendra Singh, BJP general secretary Vijayant Jay Panda, Assam minister Himanta Biswa Sharma aser party lennir tejen Dilip Saikia nungertem aden.

Iba senden nung BJP indang star campaigner asütsü tenüngtem den tanga onük aika benoka jembitep ta osang ajanga ashi.



February 19, 2021 nü Assam Chief Minister Sarbananda Sonowal-i Lokpriya Gopinath Bordoloi (LGBI) Airport indang International Cargo Terminal nung centre for perishable cargo lapoktsüdang agiba noksa angur. Iba sentong nung Assam commerce & industries minister Chandra Mohan Patowary aser Airports Authority of India (AAI) regional executive director, M Suresh den tanga ketdangsürtem aden. (Guwahati, February 19)

## Assam nung AASU-i lungkak ait

**Dibrugarh, February 19 (Agencies):** Assam nung kechisarena nung jenjang atuba anema All Assam Students' Union (AASU)-i Hokolbarnü lungkak aitba sentong ayonga agiogo.

AASU züngsemtemi posters aser banners amer BJP sorkar anema lungkak ait.

BJP-i aniba Sarbananda Sonowal sorkari Assam nung kechisarena nung jenjang atuba

anema parnoki lungkak ait.

"BJP-i kechisarena nung aser totzü nung jenjang atuba mazüokteter. Iba ajanga nübortem timtemer. Sorkari taruba anogotem nung jenjang atuba mazüoktetera, election nung telangzüba angutsü" ta AASU züngsem kati ashi.

AASU indang Dibrugarh district unit aser Tinsukia district unit-ia kechisarena nung jenjang atuba anema lungkak aitogo.

## Arunachal Pradesh minister-i public-funded road lapoktsü

**Itanagar, February 19 (Agencies):** Changlang district kübok Miao Township aser Chophelling Tibetan Settlement sendaktepba gari lenmang ka

Arunachal Pradesh Urban Affairs Minister Kamlung Mossang-i lapoktsüogo. Iba lenmang nem Pema Kunga tenüng jaloktsüogo, kechiyong pai iba lenmang yangluba nung tongti teyari agütsü.

Kunga ya tang Toronto, Canada nung alir saka pa tamalen Chophelling Tibetan Settlement nung liasü. China-i tashiyim mapa inyakba anema Kunga-i August

2020 nung Ottawa nungi Toronto tashi kilometre 400 shi anogo 8 nung dang tetsüng agi atong.

Iba mapatong ajanga pai Tibet-i His Holiness The Dalai Lama timi arutsüba, Tibet-i aotsü tenokdangba malitsü aser Sino - Tibet dialogue pusemtsü indang takhangba agütsü.

Iba gari lenmang yangluba nung Tibet nungertemi shilem agiba atema Minister Mossang-i tenüngsang agütsü.

"Public-i tenlaa gari lenmang yanglubaji iba ya mezüng asütsü" ta Mossang-isa ashi.

Iba lenmang ya Rs 24 lakh endoka yanglu ta osang ajanga ashi.

**GOVERNMENT OF NAGALAND**  
**DIRECTORATE OF HIGHER EDUCATION**  
**NAGALAND: KOHIMA**

**NO.HED/SCHO-1/2016/****Dated Kma, the 19th Feb. 2021**

**NOTIFICATION**

It is hereby informed to all the beneficiaries of Scholarship under Department of Higher Education that there are some cases whereby the scholarship amount cannot be credited to the beneficiaries account due to invalid/frozen account. Therefore, students whose names are in the beneficiary list but are yet to receive their scholarships for the periods 2017-18,2018-19 and 2019-20 are directed to email his/her Bank Account details along with the serial number in the beneficiary list to the email given below.

The last date for scholarship claim is on or before 20th March 2021. Unclaimed cases will be declared null and void and duly reported to the Government.

Email: query.hescholarship@gmail.com

**Sd/-**  
**Dr. APENI LOTH**  
**DIRECTOR, HIGHER EDUCATION.**

*Issued by DIPR*

**GOVERNMENT OF NAGALAND**  
**DIRECTORATE OF HEALTH & FAMILY WELFARE**  
**NAGALAND: KOHIMA**

**No.DHFW-5/TRG/STIPEND/MISC/2019/6805-808****Dated Kohima 19thFeb'2021**

**NOTIFICATION ON ONLINE SCHOLARSHIP SCHEME**

It is hereby notified to all the students and institutions that the online submission under common scholarship portal of Health & Family Welfare Department is hereby extended till 15th march 2021 under URL <https://Scholarship.nagaland.gov.in>

**SD/-**  
**(Dr.KEVICHUSA MEDIKHRU)**  
**Principal Director**  
**Directorate of Health & Family Welfare**  
**Nagaland:Kohima**

*Issued by DIPR*

**GOVERNMENT OF NAGALAND**  
**DIRECTORATE OF HEALTH & FAMILY WELFARE**  
**NAGALAND: KOHIMA**

**No.DHFW-5/D.Pharm/Part-II/2014****Dated, Kohima the    th Feb'2021**

**NOTIFICATION**

With reference to the Letter No.2021/AMC/3198/Dated;16/01/2021, the following Candidates are selected on 17th Feb'2021 to undergo Diploma in Pharmacy (D.Pharm) course at Institute of Pharmacy, Assam Medical College, Dibrugarh for the Academic session 2021. The following Candidates are provisionally selected through Academic Merit Marks.

Acceptance Letter may be submitted to the Office within 5 days from the date of issue of the Notification.

***Selected List***

1. ImtijunglaLongkumer
2. Zanathung R Khuvung
3. TialongLongchar
4. Kirenla
5. Tusadenmei

**SD/**  
**DR. KEVICHUSA MEDIKHRU**  
**Principal Director**  
**Dte. Of Health & Family Welfare**  
**Nagaland: Kohima.**

*Issued by DIPR*



## TIR YIMYIM YIMOBILEM (EDITORIAL)

DIMAPUR KÜPTOKNÜ, TSÜKLAI(FEBRUARY) 20, 2021

### MAKABA MEMIIMSHITET !

**T**angar state-tem den medemdangdangbo, Nagaland state kum ka atema senotsü sentong yangluba ya, asenok tsürabur oshi nungbo amitsür sentong amaia ta ashitsüsa senotsü department shia nem lezmüksüsbaji tangatsübo tajung saka reprangdangra onsara mechimenu ta angur. Ajisüaka, takababo miimshitetsü saka makababo memiimshitet, anungji kechi aka aser kechi angutsü imlar, iba teimla nung kum shia chaplee kilonseri senotsü sentong renema bener arua benokba angutsü. Aji oda, taruba 2021-22 kum asoshia Nagaland state senotsü sentong yakanü tatar senden nung benokdang, Nagaland Chief minister aser chaplee kilonser, Neiphiu Rioi sen arutsü imlaba ajak agi crore 22,451.28 aser indoktsü nungdakbaji sen crore 22816.61 sayua lir. Ibaji kodang sükdangdir tarutsü aliba dang nungibo teindoktsü nungang sen crore 365.33 talila adokba angur. Tetezü, sangkum kuma state nungdak asoshi sen agi meperitsü, anungji sentsü nung atemtsü. Atangji, state ka asoshi sen crore 22816 ji aika masü, saka Nagaland asoshibo aika, kechiyong tang tashi Nagaland state nung government ajangzüksüsa tarulen mali saka teindoklenbo onsara, iba jagi state atema aruba sen noklang nung shilem 40 shi (40%) ita sen aser pension agütsüba nung endokerbo, tanungba 60% jagiang tanga nungdaktem inyaksüsa akümer. Nagaland asoshi timtem kaji, state senpongi sen arutsüsa Nagaland nung industry tulu kata mali, gari totzü atsüa magitetter, ali telong nung aliba mijangbo atur saka yang nung jagi state asoshi chikhu junga mesarutetter, light aser tzü bill agi pa mang matur. Manipur ama tangar state nungbo ILP agütsüba nungi dena state senpongi kum nung crore aika aiter saka Nagaland otsü nungbo ILP agütsüba nungi government senpongi yamaji chikhu junga aitba otsü mali. Aji oda, state asoshi senotsü tarulen-a mali aser tarulen tilala kar aliba lenmangtem nungia junga sarutetba osang mangashir. Iba ama tensa tia ka nung Nagaland state taruba kum asoshi senotsü sentong yanglua bener aruba nung nungdakba mapatem ajak rongnung senotsü teimba agüja inyaksü shimtetba mapaji aluyimba lir. Atangji, kum shia department-tem ajak rongnung ka shimteta sen teimba lezmükja anepalutsüsbaji sentong tajung, ajisüaka Nagaland government-i taruba kum department ajak rongnung temulung tagütsütiba agüja inyaksü shimtetba Agriculture department nem sen lezmüksüsbaji reprangdangra, sen crore 6 ser lakh 65 lezmüksüba angur aser iba sen nung jagi sen crore 3 agiteta alu lenmang 65 yanglutsü tebilemba lir. Tetezü alu lenmang ka yangluba nung sen lakh 4 ser tasadang endoktsü. Ibaji kodang bilemdangdir, lakh pezü agi alu lenmang yanglubaji kechikoma lenmang ka asütsü aser tanungba crore 3 ser tasadang jagi Nagaland nung alirtem ajak peritsüsa züsentetsü asoshi kechikomaka yaritsü ta bilemer. Asen state senotsü sentong ya tangar den medemdangra, taaktsüka lir saka asen tashi agi ojang dang, anungji jepaka nüksü malu. Tangarbo asen kidanger Assam nung Jorhat nungi Majuli tashi kilometre 8 apu ka sen crore 925 endoka yanglutsü asoshi tenzükogo aser ano Dhubri (Assam) nungi Phulbari (Meghalaya) tashi kilometre 19 apu ka sen crore 5000 agi yanglutsü. Itemji kodang bilemdangdir, asen o pi na atishitepla masü, talangka lir. Aji oda, asen state government senotsü sentong yabo mapa tasen inyaka aotsüba sentong masü saka tang aliba kiojen aser lenmangtem tajungba kuma anepalutsü aser senotsü arulen kechisa ali, itemji khen reprangshia tapok atangtsü aser tajungba kuma yanglushitsüba sentong dang asütsü nungdaker. Atangji, Nagaland nunga ali tema aser telong nung rongsen jenti lir, anungji gari totzü nungi shir süng long tashi agiteta ayokba nungi state government senpongi sen chikujunga arutsüsa inyaksüla. Joko, gari totzü ya tarutsü anogotem bilema magitetti ayutsü menügdaker, kechiyong alima nung totzü magimadang totzü melen amshitsüsa tanga tajungba ngutetsü. Nisung karibo state government senpongi sen aittsü atema yi ayoktsü melatsüla ta jembir saka light aser tzü bill dena junga sarua magütsütetba lima nung yi ayokba nungi nübortem yaritsüsa sen arutsüsbaji asenok atemabo tamamangtsü mapa ka lir. Aji oda, ochi ya sen agi aliba oset ka asünungbo, Nagaland state kum ka nung arutsüba sen ajunga kecha department nungdak nunga mamshii, senotsü sentong nung ochi alitsü asoshi enokla ta bilemer. Atangji, pei akaba yari sentong yanglutsü asünungji, sangkum kum asoshi yangluba Nagaland senotsü sentongji junger ta südi aser sen mechimenuka lezmükba nung jagi tenzuka, ketdangser ajaki ochishia inyaksüba sentongjiang sentongtem ajak dang tongtibangba sentong südaktsüla.

## OLEMSABANG

### ALIMA NUNG TAMANG TIR TETSÜ 4 (PEZÜ)

~ A. Imdong Jamir, Sungkomen

Kenu anogo Abraham-er jabaso Isak (lanuwa) Ismail den kima kazüa liasü. kidang nungi kinüngtsü Sarah-i tena kazübaji ngua Abraham dang ashi, Ismail ji tangsa kidang nungi aridokang, Alazer Ijip tsür-i asoba pa senmanger masütsü. Tanüla temeshi akaba tsür Sarah, lai tarutsü anogotem nung ozü chir Isaki ni meshizükba Tsüngremer senmangji amangtsü, onok süa-mar külen Ismail-i rakteptsü. Ni akümüli piyong sarasademer ang iba jabaso angü. Tamang agi Saraia arshi anogo süitemer külen nu menden nung metsü mashisa akümtsü tashi angü. Kechiyong shibai nangzüker pa dang lai tsüngchir ta züngshi. Ibri 11:11 alima nung kin ka chir madak kota yimli yangertsüba tetsü tajung, tanüla akaba tetsü ashoba chir ji ni asoshi tetemtsü ta Tsüngremi meteta Sarala o agi temulong yirur aliba tebuti Abraham dang Tsüngremi na nü kinungtsü o agizükang, kechiyong Sarala o agi Abraham temulong kanga kurema liasü. pei Tsüngrem o tajung agi Abraham melong süngzük. "Shisa taka tetsü shiai pei ki yanger As. 14:1 tetsü kati tarutsü pei chir asoshi khuret abenba ngua Tsüngremi pela. Tsüngremi Abraham nü chir, nü semchir, anüng petinu ama adoktsü. Jentipuri apudaka külemtsü. Ibai Sarala tamang nüksu ajanga ajangzükba lir. Nisung tajungi pei semchisemnur nem senmangtsü toktsür saka temenenpur rongsenji temeshipur asoshi rizünger. As.13:22 **Eli putir o Hannala na tenla kidang sarasademba**

Kenü anogo putir tetzü (yimer asoshi, arogo asoshi) tekülem ki nung mapang ajak khuret bena Tsüngrem den sensaksema khuret lemsatepa tambur Eli arshi kum 90. Elkana tebuttsü Hanna ajurutepa pei pei onük bena sarasadem. Sarasadema, sarasadema tanüla agi asüngba tetsür, tapongla maksü sükomeyir yimdong nung senzula, la dangi tanüla khuret tula aru ajip tenzük. Ajipba dak alaker ola mali, jipjen ajip. Eli putir tanüla temeshi maka putirba kanga aoksa, adianutsür na kodasür yi lanu agi meseper yagi aru, lai langzü ni yi lanu agi mesep masü tanüla temeshi agi meseper ajiper. Maneni lai ashi, ni tapongla Tsüngrem den kü ajip sarasadem langzüa agütsürapang ni pa asoshi kho memejiptsü ainker kuma na tenzükdaktsütsü. Mapang ajak nung anogo apen ajipla Hanna shi azü rusepa sarasademba ola kotak atong Tsüngremi la ola angashia jabaso Samuel agütsü. Metsütsüi (shidakba) lai nangzükba ama lar jabaso Samuel kumpa su agi nangri kangtsür, anogo shia El putir den tekülem ki nung Tsüngrem o anga entetdaktsü. Israel lima nung la chir Samuel ainker o bendagner Tsüngrem mulong chia tenzük. Ibai tamangtir Hannalai Tsüngrem den azüngashitepa sarasademba Tsüngremi aginüba tenlaji tanüla teraksaji lir. ajemalu aser temulong teraksaji nai mezüngmeshi masütsü. TK: 51:7. Kutsü aser kubui ni senzuka yujaka, saka kibubai ni asoshi anebalutsü tk. 27:10. Temeshipur tebangji taküm tzüpokdak. Saka tamajunger tebang rarapangsen agi sünga lir. As. 10:11

#### **Dawid tasü yipden nung lia Bathshebai pei chir asoshi ajipba**

Kodang Dawid tambur tasa shirangyipdeni atu Israel nung chuba mendeni atutsü terakteper adoka Adohija chuba mendeni atu. Jabaso Solomon lajar akümtsü, Israel nunger ajak lar akümtsü ta Bathshebai pei mulongjangi tanüla nung khuret arua jipa sarasademtsü tenzük. Bathshebai chuba Dawid takdangi yia sarasadema tanüsa tangsa nü taküm medempangdangsa ana jabaso Solomon tia asoshi o ka shiang, idangji Dawid-i ni sür ozü jabaso Solomoni yimsü asütsü, iba azüngashi o Israel Ministertemi agizüka idangjisa benjung tulu yanglua Solomon chuba mendeni atu. Kenü kibuba Tsüngremi Dawid chuba den yamai jembii, kodang ne anogotem temdir aser na ne tsürabur den mejangdir ni ne sülen metsü adokdaktsütsü, koba nü mang nungi adoktsü aser ni pa yimli yanglutsü. 2 Sam.7:12. Dawid o Bathsheba kibong nungi tatishitsü tulu angur, Khristar arogo nung sannüker tajung akümüli nung okronga tenzükba chir nungi mission kibur inyakba chir nungi tesayula, missionary, evangelist, deacon oda khristar arogo nung kishinüker tilaba sür shiri ochi mulung agi ajemalu nung taremsük agi tenzüker par kibong lar kibong tia indang Tsüngremi kodanga mamai taka tait, tashi temetet adokdaktsür, pa tenzüker, chir, semchir semnur kodanga mesendoker. Kibuba yisui ashi, kari ni tenzükra pai kü sülen anidakdakjang, aser ni kechi lidir yangji kü tenzüker a alitsü. Kari ni tenzükra tebuti pa tushitsü. Yoh.12:26

#### **Alemli Tsüngrem tenzüker aronger semchir Elizabeth-i Yohan aso.**

Herod chuba tensa Yusef-er kibong: kotak tenayri ajunghena, aoksa, Yusef shishiang ner chir kinü aser kinungtsü anir Ijip limai jenang, kechiaser Herod chubai tanurji tepsettsü bushir, tanüla temeshi akaba kibong süaka alima nung akümüli khuret tuluji par kibongi abentsü tia, Yusef o tebuttsü Mary nati kecha menunghang mulungso agi pei chir kinü kado rongdong nung mener Ijip limai apuso. Tasemer, mali teyariteper mali, Ijip lima kechi tia nung, shir kidang, anenzüka chia ajem. Alima nung kotak yimli yangertsü, kibuba Tsüngremi shir kibong Yusef-er kibong anünglen longja petinu, atunutsük petinu agi kibong, chirnurji taküm lenmangji anitsü, taya tetsüra shilumanen tesempar, nükmeremer, külem pur külem kiyonger atamata ulolo meyokteper asen tukolok menutsü osang bener arutsü. Saka nai ameta aliba laishiba nungi tangashitsü karaang tejembitsü meyilongi süang, ain adoktsü meyilongi süang, Yak. 1:19. Anungji nenoki memerukba ajak aser tamajung moshia aliba endoka amenloker meyidaktsüba o kobai nenok tanüla kumzüksü akok aji ajem alua agizükang. Yak.1:21. Kechiyong kibuba tenük temishipur madak lir, aser parnok sarasademba angatsü pa tenarong tendaka lir. 1 pe.3:12

#### **London yimti wainsgate arogo**

Pastor John Fawcett o tebuttsü Mary tenati sensaker yimadak arogo nungji kum 7 (tenet) sanükba mapa inyak, Carters Lane Baptist Arogoji tuluba idakji inyaksü mulongtetba par arogo den tepila salem o sentep agir arogotsür, arogo nunger car ka nung par khu oshiokja renemtsüdang arogo tenzüksür, tenzüker ajak jeptep tenzük, parnok mulong raksaa ajipba ngua tanüla temeim akaba tetsü pastorba tebuttsü, Mary-la-i ashi, pastor John yamai jipba yutsür ana koda aotsü ta tenaprongla nüksü yima, temulong shiranga yutsür motet, Car nungi khu oshizüker kidangi meyipa oa asentenshir (revival) kibubai melongba ama aria meima tenzükdi sür temimtep agi talangka tenzükba otsü lir.

Asen lima tatishitsü tulu kibuba yisui kü arogo, alima nung kotak yimli yanger ni shimtetba pur, kibong, sen agi yangko sünga, tsük agi jendang sünga yur tenzükang ta ni mashir, ni lanuwa ojala o obala nati gado tila ka terongdong asem oshir ayaterm ankongpang nung Ijip-i apusoba ama.

Kü meimba adianutem angangjo alima nung shir sensakertem lir, Tsüngremi parnok tamang nung takar akümtsü aser pa meimertem dang pai nangzükba yimli senmang amangtsü meshimtet ama? Yak.2:5.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

Wara liaka 2020 kûm Khristan Bookstores nung kaket aika yokogo



Coronavirus wara mapang Los Angeles nung nisungtemi Word of Life Christian Bookstore semdangba noksa nung angur. Iba bookstore ya 1961 kûm Joe & Evelyn Curtiss-i lapoka liasû aser tanûbo Los Angeles nung Word of Life bookstore ya Christian Retailer tulutiba lir. Iba store nungi Arogo 400 dak temai Khristan kakettem aser oset balala alir.

**February 19, 2021:** Coronavirus wara liaka aser tenokdangba balala liaka 2020 kûm Khristan bookstores aika nung Khristan kakettem aserr Arogo nûngdak osettsüset balala jenti yokzükogo, ta survey ka ajanga bushitet.

Christian Retail Association-i survey ka agia liasû aser iba survey nungji Khristan bookstores kiburtem aikati shilem agi.

Coronavirus wara aliba ajanga Khristan kakettem ayokba stores nung takoksa kanga ngur asütsü, ta bilema ibaji asadagtsü atema survey agi, ajisüaka 2020 kûm Khristan kakettem aika yokzüka shishilembaba tsütsü tajangzük kanga anguba ang bushitet.

Iba survey nung Khristan bookstore 82 nungi kiburtemi shilem agia liasü. Item bookstore 82 nungjagi 70 bo covid wara ajanga shibangtsüsa akûm, bookstore 10 lapoka liasü aser book store ana mapang shia tatsütsü shibangtsüsa akûm. Bookstore 22 nungbo 2020 kûm kanga tajangzük anguba bushitet.

2019 kûm nungi 2020 tsüngda sales chart mejungi liasü saka 2020 kûm tatembanglenbo kaket aika yokzüka tajangzük angu, aser iba atemaji Tsüngrem nem dang tenüngsang agütsür, ta Khristan bookstore kiburtemi lemsatep.

Living Water Bookstore nungi Stephanie Gann-i, "Coronavirus wara anema tenokdangbatem ajanga onoki takoksa angutsü ta ni bilema liasü, ajisüaka Tsüngremi kanga meimogo. Onoki ita shia bill agütsütet aser kûm tembang tashi nungbo tajangzük angu," ta metetdaksü.

Christian Connection store kibur, Kelli Malm-ibo, "Kûm piyong nung US sen 12,000 ajangzük, ajisüaka 2019 kûm dang nungibo October-December (2020) ita tajungba

liasü," ta metetdaksü.

Khristan bookstore kibur aikati, 2020 kûm Khristan oziülu keta aliba face masks, hand sanitizers, Kibuba benjungnung amshiba marok, lotions aser toztü aika yokteta liasü. Iba dak alia Khristan bookstores nung Laishiba-a aika ayokba survey ajanga bushitet.

On the Third Day bookstore kibur, Charlene Wiggs-i, "Wara mapang nung nisung aikati Yisu Khristaji shibaar metetnûia kakettem bushia aru. Parnok takûm nung tang mezüng parnoki Laishiba nûngdaka liasü," ta metetdaksü.

Coronavirus wara liaka 2020 kûm alima tesem ajungalen Laishiba jenti ayokba Lifeway Christian Resources-ia bushitetogo. Lifeway Christian Resources report ajanga ashiba agi, 2020 kûm April ita nungi June ita tsüngda Laishiba aika yokzükogo.

Lifeway CEO, Ben Mandrell-i, 2020 kûm Laishiba aika ayokbaji, coronavirus wara mapang nung nisungtemi teimla aser taneptsü bushiba ajanga asütsüa akok, ta ashi. "Iba ya odangbo masü, kechiyong nisungtemi timtem tensa mapang nung teimla bushia Laishiba bushir," ta pai ashi.

"Timtem mapang nung nisungtemi teimla bushia Laishiba azünger, kechiyong asenok timtemba mapang nunga Tsüngrem lir ta asenoki amanger. Laishiba ya Tsüngrem O, aser asenok timtemba mapang nunga Pai asenok mesendoker," ta pai ashi.

1891 kûm Lifeway ya tenzüka liasü, aser iba kûm nungjagi tenzüka parnoki Laishiba, kaket balala, Lai o teratet kakettem, tanurtem kaket, osangtajung kentem aser Arogo dak sendakba kakettem ajanga ministry mapa inyaka arudar.

2019 kûm January ita nung

Lifeway-i parnok meyong dokantem aika shibangtsü aser online ajanga ayokba nung taliba ranglochtsü, ta sangdonga liasü.

2020 kûm April ita nung LifeWay Christian Resources-i sangdong ka ajanga, 2019 kûm hopta ka nung kakettem ayokba den medemdangra 2020 kûm hopta ka nung Laishiba ayokbaji shilem 62 agi timba liasü, ta metetdakja liasü.

Ano Laishiba publisher, Alabaster Co.-ia, 2019 kûm den medemdangra 2020 kûm Laishiba shilem 143 agi timba yokogo, ta metetdaksü.

Maneni Christian publisher, Tyndale House Publishers-ia 2019 kûm March ita nungi tenzüka 2020 kûm March ita nung Laishiba jenti yokzükogo, ta metetdaksü.

Jharkhand nung Hindu nunger telok kati Khristantem dak azük

**February 19, 2021:** February 11 nü India kübok Jharkhand state nung Hindu yimsü alia amangertemi Khristantem dak azükbasülen Khristan asem mejungi yirua hospital nung mongdar aser Khristan 12 nem tai tonglokja ken o benok aser karbo puogo, ta International Christian Concern (ICC) osang ajanga metetdaksü.

Jharkhand nung Meral yimdak Khristantemi Tenla ki tasen ka asütsü atema mapa inyakba mapang nung Hindu nunger telok ka arua Pastor Ramnath Ram, Pravesh Ram, Sunil Ram, Shiv Shankar Kumar, Shambhu Kumar, Ayan Kumar, Anita Devi aser Ruby Devi nunger dak azük aser parnok rongnung nisung asembo hospital nung mongdar.

Khristantemi Hindu nunger Khristan yimsü dangi meyipdaksür, ta Hindu nunger jagi ayimdena liasü, ta tenük kuli alir kati International Christian Concern (ICC) nem metetdaksü.

Iba tatalokba sülen Hindu nunger jagi Khristan 12 anema

ANO GO ABEN TSÜNGREM DEN

Tarutsü Temeshi Nisungtem Tazüngkunem 6: 1-9

Oang aser kin ajak nütsüng kümdakjang. Mathi 28:19

Tsüngremi shirnoki Pa memetet parnok tarutsü nung temeshi nisung asütsü asoshi Pa temeshi nisungtem ajanga Pa metetdaksüner.

Ibai maneni inyakba mapa lir. Yisu aser putu tasen temeshi nisung Khrista temang nung atentsü asoshi tekümtet osang tajungji shijen ashitsüla.

Ibai alima ajunga nung inyakba ka lir. Alima shilem ka nung teti Yisu indang mangashi mesüra angashir amadokba teti alir. Putu ka sülen putu ka melentepa arudang alima ajak nung osang tajungji sandongtsüla.

Tangashir asoshi tasen melenshiba yimya ka lir. Ibai lir. Osang tajung mangashir takûm asoshi teti asoshi tasüba lir. Teti asoshi tasüba kishi tala shibangtsütsü osang tajungji prokshitsüla, renloktsüla aser shirnoki amanger parnok takûmji ulushitsüla.

Ibai Tangashir asoshi tasen yanglushiba aser parnok dangi takûm tasen bener aruba yim ka lir. Osang tajungi teti asoshi tasüba kishiji osang tajungji ulushitsütsüla.

Ano iba osang tajung abener asoshi meyipa reprangshiba yimya ka lir. Shirnoki osang tajungji parnok asoshi ayu ayutsü meranger Yakta ibaji maginüi akümtsü. Iba tamangji telempet akümtsü aser azülaa akümtsü. Osang tajung jembidang tejembir tamangji tasen kûmshir. Temeshi nisungi temeshi nisung tasen putu ajak nung yanglutsüla ta Yisui tejangja jembi.

Tanela Temeshi kü kümtetdakba tenüng tushi aser tangar pa dangi anir arutsü asoshi kü tebang aser takûm amshiang ta Yisu tenüng nung mepishir. Amen.

ken o benok aser parnok rongnungi nisung asem- Sunil Kumar, Sambu Kumar aser Aryan nungerbo idangyongjisa police-i apuba sülen jail nung puokogo.

ICC den jembidang Khristan kati, "Iba ya jelia sentong yanglu amakba asütsüa akok. Hindu nungertemi yimdak Tenla ki shibangdaksüner, ibayongji parnoki pastor anema inyakba dang masü saka Tenla ki tasen yangluba anema nokdaker," ta metetdaksü.

India nung anti-conversion ozüng benoka aliba state tem rongnung Jharkhand densema lir; iba ozüng nungji ajemdaker Hindu yimsü alia-a amangertemi Khristantem anema inyaker.

Ano tanga osang ka nung, Jharkhand nungsa Garhwa district kübok Khala yimdak Korwa tribal kibong aseme Khristan yimsü agizükba atema yimdaklirtemi parnok sendoker.

Tribal putir kati, iba area nungji Hindu nunger, Sarna tribal yimsü amangertem,


Muslim aser Khristantem tsüngda akhümtsübutepa tesünep nung dang lia aruogo, ajisüaka Khristantemi tamangba yimsü meyipdaksür, ta olulu prokba sülen nungi Hindu nungertemi Khrisantem anema inyaker.

Mapang shia BJP mesüra Vishwa Hindu Parishad aser RSS teloktemi iba tesem nung tamangba yimsü meyipdaksüba indang osang balala proker saka item osangji tai, ta nisung ajaki meteta lir, ta Khristan lenir kati ashi.

Korwa kin ya India nung "particularly vulnerable tribal group" ta official süa agizükogo. Tesüiba kûm ka tsüngda Korwa tribal kibong 24 bo Khristan yimsü dangi meyipogo ta osang angazüker. Korwa oshi ya samatsüsa lir aser Garhwa district nung Korwa nunger 6,000 shi dang kûmogo.

Jharkhand nung nütsüng million 33 nungi Khristan nütsüngbo million 1.4 lir, aser Khristantemji timbaka tribal nisungtem lir.

## OLONG PAITEP # 5730



## TIPILEN

1. Nisung jenti
4. Tsük rudenba
6. Temzüng tesashi
8. S\_ \_ \_ i
9. Nisung rongnung telemsa
10. Anogoshi
12. Ajanga aor
13. Tsük rizügdak
14. Tebang nungi adokba
16. Süngdong tatembangtiba
17. Meputep

## LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

## OLONG PAITEP # 5729 TELANGZÜBA

## TIPILEN :

1. Tanga, 6. Wara, 7. Rajang,
8. Ainer, 9. Anema, 10. Jabili,
11. Among, 12. Miim, 13. Anem.
14. Ngashi, 15. Nala, 16. Mechi.

## LANGTSÜNGLEN :



## ALOKBA ASER PRIME MINISTERBA NA- 5

(Yashi adok nungi...)

**Alok** - Prime ministerba, iba jagi ni Alokba ashira to aser ni tonga aru a to!! Parnokji town nung alirtem dang, gari arutettsusa lenmang mali, iba jagi parnok dangsa lemsaa achir sudi, saka nai dang ni Alokba shimra, nibo yimtak dang alirasungji tetsung agi yimtem summa senzutsu kanga dang experience.

**PM** - Alokba, na Tsungrem den tezungzuktep tulu yur, kechi tia ajurudir ajuruang nupur tenzuktus ta ser inyaker alitsu nung, town nung linu mechi koda ser religious nungi political dangi meyiptsu??!

**Alok** - Prime ministerba na? aji yamai... politician tem ya ochi mashi tesa, saka ni Alokba nupur meimer...ni hindu nung muslim nung etc ajak Christian kumdaktsuba ama ni shimra nisung mesuzuktsu sempetbo ku dak peria lirji...India nung party ajak ya tazungla kumtsur bjp dang kumdaktsutsu aser teti tatem maka nasa chuba daktsutsu adi!!

**PM** - Oh Alokba, na tangani!!!saka imlibilema president post bo vacancy mali saka advisor inyaktus arungma.

Lilir- MSJ

## TANÜBO NAI LANGZÜANG

Q. Technical Information, Forecasting and Evaluation Committee (TIFAC) ya \_\_\_\_\_ Ministry kübok lir.

A. Science and Technology

B. Earth Science

C. Railways

D. None

===== (Taruba adok nung onoki langzutsü)

YASHI ADOK TELANGZÜBA: Telangana

## NAI-A YA METETTER MA?

## FEBRUARY 20 NÜ ASOR TONGTIBANG NISUNG KAR:

- American Revolutionary War hero William Prescott (1726)
- Photographer Ansel Adams (1902)
- Fashion designer Gloria Vanderbilt (1924)
- Film director Robert Altman (1924)
- Actor Sidney Poitier (1927)
- Auto racer Bobby Unser (1934)
- Singer Nancy Wilson (1937)
- Auto racing businessman/team owner Roger Penske (1937)
- Singer Buffy Sainte-Marie (1941)
- Hockey Hall of Fame member Phil Esposito (1942)
- Actor Sandy Duncan (1946)
- Actor Peter Strauss (1947)
- Actor Jennifer O'Neill (1948)
- Socialite Ivana Trump (1949)
- Actor Anthony Head (1954)
- Comedian Joel Hodgson (1960)
- Basketball Hall of Fame member Charles Barkley (1963)
- Actor French Stewart (1964)
- Model Cindy Crawford (1966)
- Actor Andrew Shue (1967)
- Musician Kurt Cobain (1967)
- Pop singer Brian Littrell (Backstreet Boys) (1975)
- Actor Jay Hernandez (1978)
- Comedian Trevor Noah (1984)
- Actor Miles Teller (1987)
- Singer Rihanna - Robin Rihanna Fenty (1988)
- Actor Jack Falahee (1989)

## SUDOKU # 5772

|   |   |   |   |   |   |   |   |   |
|---|---|---|---|---|---|---|---|---|
|   |   | 8 |   | 2 |   | 6 |   | 3 |
|   | 2 | 1 |   | 3 |   |   |   |   |
|   |   | 9 |   | 5 | 8 |   | 1 |   |
|   |   |   |   | 4 | 3 | 9 | 1 |   |
|   |   |   |   |   | 2 | 8 |   |   |
| 9 |   | 3 | 8 | 7 |   | 6 | 5 |   |
| 5 | 9 | 2 | 6 | 8 |   | 1 | 7 | 4 |
| 1 |   | 4 | 2 |   |   | 8 |   |   |
|   |   |   | 1 | 4 | 7 |   | 2 | 9 |

## TELANGZUBA # 5771

|   |   |   |   |   |   |   |   |   |
|---|---|---|---|---|---|---|---|---|
| 6 | 3 | 1 | 7 | 2 | 4 | 5 | 9 | 8 |
| 7 | 8 | 9 | 5 | 6 | 1 | 4 | 2 | 3 |
| 2 | 4 | 5 | 8 | 3 | 9 | 6 | 7 | 1 |
| 5 | 2 | 8 | 4 | 9 | 3 | 7 | 1 | 6 |
| 9 | 6 | 4 | 1 | 7 | 2 | 3 | 8 | 5 |
| 1 | 7 | 3 | 6 | 8 | 5 | 2 | 4 | 9 |
| 3 | 5 | 7 | 2 | 1 | 8 | 9 | 6 | 4 |
| 4 | 1 | 2 | 9 | 5 | 6 | 8 | 3 | 7 |
| 8 | 9 | 6 | 3 | 4 | 7 | 1 | 5 | 2 |

## OJANG LUTEP # 5318

|           |   |                      |
|-----------|---|----------------------|
| DOLENNG   | : | <input type="text"/> |
| MTETIM    | : | <input type="text"/> |
| RUDAAJUNG | : | <input type="text"/> |
| SATSHISÜ  | : | <input type="text"/> |
| EASR      | : | <input type="text"/> |
| HIASZÜ    | : | <input type="text"/> |
| NGNU      | : | <input type="text"/> |
| ÜNGKIS    | : | <input type="text"/> |
| AKÜM      | : | <input type="text"/> |
| ANGSKHI   | : | <input type="text"/> |

## OJANG LUTEP TELANGZÜBA # 5317

TELOK NUNG MAGINÜ JENDOKBA LENIRI NÜTSÜNG  
TIMBA AYONGDENER LOKTI YANGLU

## TAN HOPTA ATEMA - KOMA SÜLA ?

Q. 1963 küm 1st December sülen Nagaland nung arua alirtem nem Nagaland nung dokan amentsü, taxi aser auto rickshaw anishitsü permit magütsü nunga koma süla?

Olong 20 shi nung February 19, 2021 tashi nung iba telangzuba ya onok dangi (e-mail - tiryimiyim@gmail.com) :  
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsütsü.

## Srinagar nung kiralongrar kati police ana khaset



Srinagar, February 19, 2021: Hokolbar anüngdang Srinagar nung police station ka anasa kiralongrar kati police ana dak injang khaloktsüba sülen ajendang tangokba noksa nung angur. Iba tatalokba sülen Constable Suhail aser Constable Mohammed Yusuf na hospital-i anir ao, saka mekümzükteti süogo.

### Srinagar, February 19 (Agencies):

Hokolbar anüngdang Srinagar nung police station ka anasa kiralongrar kati police ana dak injang khaloktsür ajen; Constable Suhail aser Constable Mohammed Yusuf naprong hospital-i anir ao, saka mekümzükteti süogo.

Iba tatalokbaji nisung aikati ngua liasü aser CCTV cameras nunga tangoker liasü, ta police-i metetdaksü.

Constable Suhail tama asü

aser Constable Mohammed Yusuf bo operation agiba takdangi anir aiba mapang nung ang asü.

Iba tatalokba sülen police team aika iba tesem jagi ao aser dokan balala nung aliba CCTVs recording agizüka bushisüngdang tenzükogo.

Police anaji Baghat nung aliba airport lenmang nung duty teinyakdak liasü. Kiralongrar sangji Saqib lir ta jangjaogo; pai pa süoshi telung nungi

prangpong agizükba sülen ana nungi police ana dakji injang aika khaloktsü.

Director General of Jammu & Kashmir Police, Dilbagh Singh-i, "Onoki kiralongrar sangji jangjaogo aser kobi melii pa aputsü," ta metetdaksü.

CCTVs ajanga kiralongrar sangji Srinagar kübok Barzulla area nungi Saqib lir ta jangja, ajisüaka tang tashi nungbo pa kechi telok nung dena aliar mejangja.

## UP nung tensa majungbaji police nem tashi agütsüba ajanga lir: Akhilesh

### Lucknow, February 19 (Agencies):

Hokolbarnü Samajwadi Party tongti lenir aser taoba mapang Uttar Pradesh Chief Minister, Akhilesh Yadav-i tang Uttar Pradesh nung tzüzüng-ozüing tensa majungba atema state sorkar nem tai tongloktsü.

State nung tensa majungbaji state police nem tashi tali agüja pei sünütsü südaktsüba agi lir, ta paisa metetdaksü.

State sorkari lanurtem, mapa mangurtem aser yimten lenirtem densema lokti nung ajak mezüngmeshir; Samajwadi Party nung inyakertema aika nem tiyazü nung tai tonglokja ken o benokogo, aser ibaji police tai ajanga lir, ta pai metetdaksü.

Yakünü Unnao district nung Dalit tsür ana tasümgang anguba

dak sendakba nung Yadav-i, ibaji shirnok tai ajanga?, ta asüngdang.

"Kodang sorkari police nem pei süsütsü südaktsüdir yamaji ataloktsü. Jalatem aser tetsütem kümzüka maliba state ka nung shibai sen indoka inyaksü? Badaun, Hathras aser Unnao district tem nung (tetsür anema inyakba) tatalokba ken o aika lir. Hathras nunga (police-i) ayaterm nung tetsür tasümgang ka rongdoka liasü," ta pai ashi.

State nung police ket nung lia nisung aika asüba mesüra tiyazü rara nung police-i nisung aika khasetba ken o aika lir; iba sorkari yimsüsüba tenzükba mapang nungi tiyazü rara nung nisung aika khasetba ataloker, ta pai ashi.

State nung aluyimba sector mejungi kümogo, ta shia SP tongti leniri, "Aluyimba ozüing tasen asem ajanga aluyimertem tajanzük angutsü, ta BJP-i maneni jembia arur, ajisüaka linük nung aluyimer ajaki item ozüing agiendaktsüner, kechiyong item ozüing ajanga parnok tajanzük mangutsü," ta metetdaksü.

"BJP-i aluyimertem nem MSP agütsütsü aser income anasü agi timba kümütsütsü ta jembir. Tang ibaji inyaksü mapang nungbo parnoki ozüing tasen benoker, koba ajanga aluyimba sector aser aluyimertem nem timtem bener arutsür. Aluyimertem dang masü saka lanurtemia mapa manguba tebilemtsü ajurur," ta pai ashi.



February 19, 2021 nü Patna nung Bihar assembly senden mezüing anogo nung Bihar Minister Shanawaz Hussain aser tangartemi Bihar Angh, Fagu Chauhan-i jembiba onük angadang tangokba noksa nung angur.

## Aluyimertemi alu nung aonsotsü takoksa anguba aremtsüla: BKU

New Delhi, Tsüklai/February 19 (Agencies): Hokolbarnü Bharatiya Kisan Union (BKU) lenir, Rakesh Tikait-i aluyimertem dang, Centre sorkari benokba aluyimba ozüing tasen asem anema maneni Delhi arrtsülen longkak aittsü atema alu nung aonsotsü ka takoksa anguba aremtsü atema renema alitsüla, ta metetdaksü.

"Delhi arrtsülen longkak aitba manentsü, aluyimertemi alu nung aonsotsü ka takoksa anguba aremzüksüla, mesüra aonsotsü arühtsü atema kar teyari agitsüla, ajisüaka aluyimertemi longkak aitba tesem metoktsütsüla," ta Tikait-i metetdaksü.

February 18 nü aluyimertemi longkak aita ghonda pezü train lenmang mokdangba sülen maneni Bharatiya Kisan Union-i tractor nung Kolkata-i oa longkak aittsü, ta pai metetdaksü.

Delhi nung Republic Day anogomong nung aluyimertem

longkak aitba mapang nung rara adokba sülenbo aluyimertemi yimtsüngtem nungi teyari agitsü atema state balala nung Mahapanchayats ayongzüka agia arudar.

January-February itatem nung Uttar Pradesh, Haryana, Rajasthan aser Punjab tesem aika nung maha-panchayats agiogo aser item sentongtem nung Congress lenirtem-Priyanka Gandhi, Rahul Gandhi aser Sachin Pilot nungeria shilem agia denogo.

BJP lenirtem anema BKU lenirtemi, aluyimba ozüing tasen asemprong magien tashi sentong kecha nunga BJP lenirtem mejaoktsü, ta metetdaksüogo.

Tawa Muzaffarnagar (Bihar) nung mahapanchayats sentong ka ayongzüka agiba mapang nung BJP lenirtem shinga sentong balala nung mejaoktsü atema telemetba agi, ta BKU tongti lenir, Naresh Tikait-i metetdaksü.



Jaipur, February 19, 2021: Hokolbarnü Jaipur nung District Collector, Antar Singh Nehra-i Pakistan nungi aruba Hindu nung refugees nem linük senso agütsüba sülen parnok den külemi tangokba noksa nung angur.

## Pangong awatsüing area nungi India aser China sepai ajak ainshiogo

### New Delhi, February 19 (Agencies):

Ladakh kübok Pangong awatsüing area nungi China aser India sepaitem ajak ainshiogo, aser maneni Honibarnü India aser China naprongla nungi sepai tongti ketdangsertem senden amentsü, ta ketdangsertem osang ka ajanga metetdaksü.

Iba senden nungji anüdoklen Ladakh kübok Hot Springs, Gogra aser Depsang nungi linük anaprong sepaitem ainshitsü atema jembitsü.

Osang angazükba agi, Brihostibarnü tashi nung Pangong awatsüing area nung sepaitemi raraba hadir, süki aser kiojen balala ajak bener ainshiba maparen tembangogo.

Corps Commander-level nung 10buba sendenji Honibarnep 10:00 ako nung China tsütsülen LAC nung aliba Moldo border point nung amentsü.

Hokolbarnü tang mezüing China-i yaküm June ita nung Indian Army den Galwan Valley nung raradang par sepai pezü asüba nangzükogo. Iba rara nungji India nung sepai-a 20 asü.

February 11 nü Parliament nung Union Defence Minister Rajnath Singh-i, India aser China napronglai ghonda 48 tsüingda Pangong awatsüing area nungi sepaitem ainshitsü bangjemba osang metetdakja liasü.

Honibarnü India tsütsülen nungi Lt Gen PGK Menon (Leh-based 14 Corps Commander) leniba nung aser China tsütsülen nungi Maj Gen Liu Lin (South Xinjiang military district of the People's Liberation Army Commander) na leniba nung senden amentsü.

Yaküm China nung sepaitemi Finger 4 aser 8 nung bunker den kiojen aika yanglua liasü aser Finger 4 adena India sepaitem marudaktsü. Ibaji India-i ashishia mangatettep adoka liasü.

Tesüsabuba sepai tongti ketdangsertem senden nung India-i China dang Pangong awatsüinglen Finger 4 aser Finger 8 nungi sepaitem ainshitsüla, ta mepishia liasü. China-ia India dang iba awatsüing south len India nung sepaitem ainshitsü mepishia liasü.



Sydney nung aliba local health district vaccination hub ka nung Sarah Fletcher mozü agitsü renemshiba mapang Australia Ato Kilonser Scott Morrison-i (abelen) repranga aliba noksa nung angur. Australia linük tesem ajunga nung COVID-19 vaccination sentong ya Hombarnü tenzüksü

## Myanmar nung longkak aiter ka yirur anogo ter lir asü

**Naypyitaw, Tsüklai/February 19 (Agencies):**

Myanmar nung longkak aiter arishiba mapang police temi injang agi tetsür ka yirutsüba Hokulbarnü süogo, ta la teti-i ashi, aser February 1 nü mitkartemi tashiyim agi sorkar atsüngdokba sülen nüburtem hopta ana longkak aita aruba mapang nisung asür mezüngbuba akum.

Myanmar northern tsütsü Myitkyina jila nung pua aliba sorkar lenir Aung San Suu Kyi indang noksa bener nüburtem yimtong süa jajaba police temi arishia nisung 50 shi pur lia la asüba osang ya angashii, ta human rights activist kati ashi.

Arishi kum 20 jungli, Mya Thwate Thwate Khaing ya linük yimtiba, Naypyitaw nung longkak aita tesem ka nung February 9 nü injang agi tekolak nung yirutsüba sülen mozü kidang life support nung anepalua liasü.

"Ne kanga jashir aser ni ashitsü kecha mali," ta la teti Ye Htut Aung-i telephone ajanga osangbener dang ashi.

La asüba ya longkak aiterem asoshi yimiyim ka ama akum, shirnok Hokulbarnüa yimtong nung adenshia liasü.

Mitkartemi sorkar atsüngdokba aser democracy campaigner tejen, Suu Kyi apuba anema anogoshi longkak aityonga aruba Hokulbarnü hopta ana jungogo.

Kin balala agi sünga aliba linük nung jila aser yimti ajunga nung longkak aita ya kum 50 jungnüa mitkartemi yimsü süa aruba anema nokdakba mapang azüdokshiba amabo mesüi yimjung nung liasü.

Saka nüburtem prokshia odaktsütsü mechi police temi rubber bullet tem agi nisung dak khaogo. Longkak aita tesem ka nung police ka yirua asü, ta mitkartemi ashir.

Myitkyina nung süng bena aliba police aser sepaitemi longkak aiterem tesem balala nung prokshia arishiba video kar



social media nung sayua liasü.

"Nisung 50 shi puogo. Mitkartem indang gari nung longkak aita nungi nisungtem putener," ta rights activist Stella Naw-i ashi.

Kachin State yimtiba nunga hopta ana tashi rongrong adoka arur, kong police temi rubber bullets aser lijakjang amshia longkak aiterem arishi.

Yangon nung aliba police temi yimti nung longkak aita tesem tongtiba, Sule Pagoda shibanga iba tesemi aoba lemjem ajunga nung barricades tem yoka liasü, kong hopta tepiyong nisung meyerijang aika adenshia liasü.

Ajisüaka barricades anasa nisung noklang aika adenshi aser ano university anasa longkak aita tesem ka nung nisung meyerijang aika adenshia yimti tiyongleni ao.

Longkak aita kisüng masü saka Myanmar nung civil disobedience movement ka tenzükba ajanga sorkar maparen timba marakzüi kumogo aser linük balalai mitkar nem khuret tali agütsür.

Brehostibarnü Britain aser Canada-i tenokdangba tasen sangdongogo aser Japan-ia India, United States aser Australia linüktemi tekeratiba nung democracy nungdaker ta nokdakba nung busemer, ta ashi.

Mitkartemi tang tashi tenokdangba tasentem nung telangzüba agüja mali. Mitkar indang odongtar kati Mongulbarnü osangbener senden ka nung tenokdangba agütsütsü imla liasü, ta shia liasü.

Taoba mapanga Myanmar mitkar lenirtemi bendangeri ashiba nung anidakba otsü aikabo mali aser parnok ya kidanger linük, China aser Russia den tesendaktep tajungba lir.

2017 kum Muslim Rohingya kin anema tim masüba mapatem inyakba mechi mitkar lenir Min Aung Hlaing nem anüolen linüktemi tenokdangba agüja lir.

"Mitkar lenirtem nem tenokdangba agütsüba ya yimya ka amai lir, saka mitkartem indang company nem tenokdangba agütsüba kanga agi tajungba asütsü," ta Burma Campaign UK group nung director Mark Farmaner-i ashi.

Britain-i mitkar tanishir aem indang rongsen soitba aser senzusempongtsü nokdangba aser ano mitkartem nem teyari agütsütsü aliba anendaktsütsü mera agiba aser British businesses mitkartem den külemi inyakba nokdangba atema lanur lenir aser activist Thinzar Shunlei Yi-i pela agizük.

Kum aika mitkartemi yimsü süa aruba sülen mitkartem den sendaktepa aiba shishilempartem asoshi nütsüng yongsük million 53 aliba linük nung banking nungi beer aser telecom nungi transport tashi jenjang tajung lir.

November 8 nü agiba election nung Suu Kyi'er National League for Democracy ajanga takok anguba nung ashikülak mapa inyaka lir ta aija mitkartemi February 1 nü Myanmar nung sorkar atsüngdoka liasü.

## Mogadishu nung longkak aita khatep

**Mogadishu, Tsüklai/February 19 (Agencies):** Somalia nung election menua magiba ajanga nüburtem ain adoka linük yimtiba, Mogadishu nung longkak aita mapang security forces aser longkak aiter raratepba mapang khatepa liasü, ta tenük kuli alir, Somalia sorkar aser opposition lenir temi ashi.

Injang ya shirnoki mezüng khaloktsüar mejangja, saka tenük kuli alir Yusuf Mohamed-i ashiba agi, security forces aser longkak aiter anükba armed guards tsünga kanga sashia khatepa liasü. Longkak aiterem ya airport tongtipa lenmang nung longkak aita jaja liasü.

"Yangji asü-amar alitsü saka onok tangbo atsüka lir aser kechi atalokar tejangja memeter," ta pai osangbener dang ashi.

"Onok yimjung nung airport lenmang nung taoba ato kilonser Hassan Ali Kheire den külemi jajaba mapang security forces temi onok dak injang khaloktsü aser rongrong tenzük," ta tenük kuli alir Fadumo Moalim-ia osangbener dang ashi.

Civilian tem face mask agir Somalia nisan ayiptena aliba mapang prangbong ola angashiba sülen parnok tesem balalai jena aoba video ka osangbener dang sayua liasü.

Horn of Africa linük nung election agitsü menua mechi hopta ishika mepetmesü adoka arur iba timtem ya ajurur.

Airport anasa prangbong ola angashio go aser iba tatalokba ya sorkar aser opposition osangtem ajanga ashi, ta Nairobi nungi osangbener kati ashi.

"Lendong atalokba tesem ya police aser mitkartemi muketbanga lir ta onok dang

ashi," ta osangbeneri ashi.

Iba tesem nung ki kar nung ola tulu adoka apokba angashio go saka tangbo tensa azüoka lir.

Tir Mohamed Abdullahi Mohamed kümsük February 8 nü tembangba sülen mapa yujang ta opposition teloktepi takhangba agütsür.

Iba linük indang semi-autonomous region tem nung election koma agitsü, ta mangmangtepa indirect election agitsü mapang süyidaktsü.

Election mangatetep atema jembishinütsü asoshi Tir Abdullahi Mohamed-i Hokulbarnü Mogadishu nung regional lenirtem den senden ka amentsü lir.

Yimti nung coronavirus cases tali akumba ajanga sorkari opposition dang longkak maittsü shia liasü. Ajisüaka opposition temi longkak aittsü nangzük.

"Election timi agitsü asoshi Tir Abdullahi-i lenmang melapoktsü tashi asüng nungi tenzuka Somalia tesem ajungalen nüburtemi longkak aittsü," ta opposition coalition ajanga Brehostibarnü sangdonga liasü.

Opposition lenirtem anüker "armed militiamen" temi sorkar indang security checkpoint tem amaker aser Mogadishu agitsü meranger, ta Somali sorkari sangdong ka nung tai tonglokttsü.

Ajisüaka sorkari tai tonglokttsüba opposition temi magizük aser sorkar meyong sepaitemi parnok anenzuka aliba hotel tem amaker, ta ashi.

"Ni aser taoba tir Hassan Sheikh Mohamud anenzuka aliba Maida hotel nung parnoki amak," ta taoba tir Sharif Sheikh Ahmed-i Twitter nung ashi.

## US-i tenokdangba agienba sülen Iran-i nuclear inyakyim melenshitsü: Zarif

**Dubai, Tsüklai/February 19 (Agencies):** US-i tenokdangba agüja alibatem agienba sülen Iran-i nuclear sentong nung inyaksangshi tekeratiba nung melenshitsüü, ta foreign minister-i Hokulbarnü shia Washington-i jembishinütsü maongka agütsüba nung Tehran nokdaka aliba tali jangjashia sayu.

2015 kum Iran aser alima nung tashi tulu linüktem tsünga tezüngzüktep agiba 2018 kum taoba tir Donald Trump-i senzuka yutsür Iran nem tenokdangba tanaben agütsüshiba lepa repringshitsü renema lir, ta Joe Biden administration ajanga Brehostibarnü ashi.

"Tenokdangba kodang agütsüdir iba sülen onoki tekeratiba nung mera ajunga agitsü. Tongmelang," ta Foreign Minister Mohammad Javad Zarif-i Twitter nung ashi.

Mangatetep adoka aliba nung tang diplomatic tsütsü tangatetep kati arutsü nungdakba sayua Iran ketdangsür kati osangbener dang ashiba agi, Washington-i tezüngzüktep asendenshitsü atema maongka agütsüba asoshi Tehran shisadanga mapang lir.

"Saka parnok mezüng tezüngzüktepi arutsüla. Iba sülen 2015 tezüngzüktep indang framework nung aliba ama asendenshitsü atema mera agitsü asoshi jembitsü," ta ketdangsüri ashi.

Tehran-i nuclear weapon tem yangluba aser aliba nokdangtsü nükjidong nung yangluba nuclear accord dangi linük anaprong meyipa arutsü atema Iran den jembitsü renema lir, ta Washington-i Brehostibarnü ashi.

"Onoki kodanga nuclear weapons mebushi aser ibai ozü defence tesayuba nunga mali. Ozü tanginübaji tejangja. Tenokdangba ajunga agiener diplomacy nem maongka agüjang," ta ketdangsüri ashi.

Washington-i tenokdangba agüja alibatem melenshi tenzüksü atema Tehran-i February 23 ya tatem asütsü anogo sükzüka lir, aji mesüra tezüngzüktep raksatsü mera tulutiba agia UN nuclear watchdog, International Atomic Energy Agency (IAEA) ajanga jongdak nung osang agütsür semdangba nokdangtsü, ta ashir.

# India nung Moto E7 Power sayaogo

## moto E7 Power leaked specifications



- 6.5-inch HD+ display
- MediaTek Helio G25 chipset
- 5,000mAh battery
- 13MP+2MP dual rear cameras
- 5MP selfie camera
- 4GB RAM + 64GB storage



**New Delhi, Tsüklai/February 19, 2021 (Agencies):** India nung Motorola-i Moto E7 Power ta nungja agütsüba budget smartphone tasen ka sayaogo. Iba "power packed entertainer" Moto E7 Power nung 5,000mAh battery, 4GB RAM, 6.5-inch display aser feature balala angutsü.

Moto E7 Power smartphone ya February 26 nü nungi tenzüka ayok tenzüksü aser Flipkart sabang den tanga tongtiban retail store tem ajanga iba smartphone angutsü. Iba smartphone ya sentsü ana - Blue aser Red nung angutsü; aser Android 10 out of the box ajanga achaayangtsür.

Moto E7 Power - 2GB RAM + 32GB storage option jenjang sen 7,499 aser top-spec 4GB RAM + 64GB storage option jenjang sen 8,299 alitsü. February 26, 2021 anüngdang 12:00 ako nungi tenzüka smartphone ya Flipkart aser tanga tongtiban retail outlet tem ajanga angutsü.

Iba smartphone nung 6.5-inch HD+ display den 20:9 aspect ratio, MediaTek meyong Helio G25 chipset den 4GB

RAM aser 64GB internal stoage inoka yanglutsüogo. Memory ulua aginürtemi microSD card slot ka ajanga 1TB tashi atsülanga amshitetsü. Company-i ashiba agi, phone nung 5,000mAh yagi ghonda 14 tashi video streaming süteter.

Camera tsütsü reprangdangra, Moto E7 nung dual rear camera setup angutsü, kong 13-megapixel primary shooter aser 2-megapixel secondary shooter dena lir. Iba smartphone tejaklen waterdrop-style notch nung 5-megapixel camera inoktsüogo.

Tawa, Europe nung Motorola-i Moto G30 aser Moto G10 smartphone ana sayaogo. Moto G10 nung 6.5-inch HD+ display den 60Hz refresh rate aser Snapdragon 460 SoC dena lir. Iba den külemi smartphone nung 4GB RAM aser 128GB onboard storage angutsü, koba microSD card ka ajanga memory ulua amshiteter. Moto G10 tesülen quad camera setup dena lir aser iba set up nung 48-megapixel primary camera, 8-megapixel ultra-wide-angle camera aser macro shots den depth sensing atema 2-

megapixel camera 2 angutsü. Selfie jangrar atema, iba smartphone tejaklen 8-megapixel shooter angutsü, koba HDR, panorama, aser 30fps nung full-HD recording support asür. Tanga feature tsütsü reprangdangra, iba smartphone nung 4G, Wi-Fi, Bluetooth 5.0, NFC, GPS, 3.5mm headphone jack aser 5,000mAh battery angutsü.

Maneni, Moto G30 nunga 6.5-inch HD+ den 90Hz refresh rate keta lir. Iba smartphone nung Qualcomm Snapdragon 662 SoC deb 6GB RAM aser 128GB onboard storage angutsü. Smartphone tesülen, quad camera setup inokja lir, kong 64-megapixel primary camera alitsü aser tanüngba camera specs tem Moto G10 ama angutsü. G30 tejaklen 13-megapixel selfie shooter inoktsüogo. Tanga feature tsütsü reprangdangra, Moto G30 nung 4G, Wi-Fi, Bluetooth 5.0, NFC, GPS aser 3.5mm headphone jack tem angutsü. Moto G30 nung 5,000mAh battery dena lir aser USB Type-C port ajanga 20W charging support asür.

## Deputy Commissioner, Peren ajanga metetdaksür

**Dimapur, Tsüklai/February 19 (TYO):** SLAA approval list nung aliba ama Peren Hq. nung nija nem ali agütsüba maparen ya 'draw of lots' ajanga February 26, 2021 nü

Deputy Commissioner, Peren indang Conference Hall nung inyaktsü, ta Deputy Commissioner, Peren, Sentiwapang Aier ajanga sangdong ka nung ashi.

Iba dak sendakba nung alir nisungtem tsüngdong arutsü mesüra temelaba agütsür temelen nübu yoktsü metetdaksür, ta sangdong ajangasa ashi.

## Jennifer Garner-i 'Family Leave' produce asütsü

**Los Angeles, Tsüklai/February 19, 2021 (Agencies):** 'Family Leave' indang cast rongnung Jennifer Garner denogo.

Arishi küm 48 tain actress Jennifer-i iba Netflix comedy nung shilem agiba den külemi produce asütsü. Iba film ya Amy Krouse Rosenthal indang best-selling book 'Bedtime for Mommy' ajanga ajungmesoba otsü ka alitsü.

Jennifer den Nicole King, Lawrence Gray aser Ben Everard nungeri iba film produce asütsü aser Jason Brian Rosenthal-i executive producer ama inyaktsü. Victoria Strouse-i film atema screenplay zülutsüogo.



Ano külen, 'The Adam Project' nunga Jennifer-i Ryan Reynolds, Zoe Saldana aser Mark Ruffalo nunger den külemi shilem agiba angutsü. Iba action-adventure movie tasen ya Netflix ajanga yanglutsü.

Shawn Levy lenisüba

(director) kübok iba motion picture yangludar, saka iba project dak sendakba nung osang kecha memetetdaksü.

Mark Levin, Jennifer Flackett aser T.S. Nowlin ajanga züluba mezüng draft nungi Jonathan Topper-i film indang script zülutsüogo.

The Group Effort Initiative kübok iba film ya Reynolds indang mezüng project alitsü.

Maneni, Garner-isa Netflix indang comedy 'Yes Day' nunga shilem agiba angutsü, koba Rosenthal-i züluba otsü nung ajemdaker yangluba film ka alitsü. Iba film nung Edgar Ramirez aser Jenna Ortega nati shilem agiogo.

## DC, Kohima ajanga land compensation atema metetdaksür

**Dimapur, Tsüklai/February 19 (TYO):** Chainage 10+500 nungi Chainage 13+800 (Package - 2) tashinung aliba 2 - Lane Kohima - By-pass indang land compensation ya ali kibur nem Deputy Commissioner, Kohima indang office nung February 20, 2021 anepdang 10:00 ako nungi agütsütsü, ta Deputy Commissioner, Kohima, Gregory Thejawelie, NCS ajanga sangdong ka nung metetdaksü.

Ano maneni Chainage 21+000 nungi Chainage 29+960 (Package - 3) tashinung aliba 2 - Lane Kohima - By-pass atema land compensation ya Deputy Commissioner indang office

nung February 22, 2021 anepdang 10:00 ako nung agütsütsü, ta sangdong ajangasa ashi.

Iba dak sendakba nung Village Council Chairman mesüra Chairman ajanga shimba nübu ka ali kiburtem jangjatsü asoshi office nung arua alitsüla.

Temalen shia aliba ali kiburtem tawa tangokba passport size noksa pezü, Aadhaar card (Xerox)/I.D Proof aser Bank Passbook (front page Xerox) bener tsüngtong arutsüla. Ali kibur dak alaka dangar shinga nema senotsü magütsütsü, ta sangdong nungsa shia lir.

## Kiphire nung Hokulbar bazaar tanaben lapoker

**Dimapur, Tsüklai/February 19 (TYO):** Mahila Shakti Kendra, Kiphire Weekly Friday Bazaar ya Bamboo Hut, KTC Market Complex nung February 19, 2021 nü tanaben lapokogo.

District Administration, DLCW- Mahila Shakti Kendra, Kiphire Town Council aser National Rural Livelihoods Mission lungjemer takok ngua Longmatra Block aser Sitimi block nungi SHGs aser tetsürtem hopta shi Hokulbarnü lapokba bazaar nung alu nung züsentetba chiyongtsütem ayoktsü ayongzükteta liasü.

Akehda Sangtamlaru Thsingmujang tir Apila Sangtam-i hoptashi Hokulbarnü lapokba bazaar ya semzükja liasü.

MSK kübok hoptashi lapokba bazaar ya block ti nungi tetsür SHGs tem melentepa urban market nung NRLM kübok SHGs tesendaktep teyari agia onsotsü-otsü ayoktsü lapoktsü.

Anasa aliba Kiphire aser Pungro amala jila nung product balala ayoktsü atema aluyimer nem MSK ajanga transport agütsür.

## Benelli Leoncino 500 sayaogo



**Mumbai, Tsüklai/February 19, 2021 (Agencies):** Italy indang motorcycle yangluba company Benelli-i India shishilembadak Leoncino 500 indang BS-VI compliant version sayaogo. Iba motorcycle jenjang sen lakh 4.60 (ex-showroom) alitsü.

Iba jenjang (lakh 4.60) ya motorcycle grey sentsü atema dang alitsü, saka red colour option atema customer temi sen 10,000 talila agütsütsüla, koba sen lakh 4.70 lakh (ex-showroom) asütsü.

Company-i ashiba agi, iba motorcycle mekaa ayutsü atema maparen tenzükogo aser tejangrar temi company indang website mesüra Benelli India

dealership tem ajanga sen 10, 000 agütsür mekaa yutettsü. Iba den bendenloksema, Benelli-i Leoncino 500 atema standard ama küm asem unlimited kilometre warranty agütsütsü.

Benelli Leoncino 500 nung DOHC, twin-cylinder, liquid-cooled, 500cc engine inoka yanglutsüogo. Iba engine ajanga 8500rpm nung 47.5PS aser 6000rpm nung 46Nm torque agütsür. Iba 8-valve motor nung 6-speed gearbox dena lir. Leoncino nung steel trellis frame, 17-inch alloy wheels den tubeless tyres, upside-down front suspension, tejaklen 320mm disc brakes aser dual-channel switchable ABS angutsü.

## Australian Open: Mertens o Sabalenka nati tetsür tarep final kokogo



Melbourne, Tsüklai/February 19, 2021: Hokolbarnü, Australian Open asayamung tetsür tarep final asaya nung, Belgium tsür Elise Mertens aser Belarus tsür Aryna Sabalenka nati Czech Republic tsür tarep Barbora Krejčíková aser Katerina Siniakova na koker sülen takok marok amer tepela nung külemi jokdenba yangi noksa nung angur.

**Melbourne, Tsüklai/February 19, 2021 (Agencies):** Hokolbarnü, Australian Open tetsür tarep final asaya nung Elise Mertens aser Aryna Sabalenka nati Czech tsür Barbora Krejčíková aser Katerina Siniakova masak 6-2 6-3 agi takok nguogo. Elise aser Sabalenka na sentepa Grand Slam title tanabuba angur alitsü.

Melbourne Park nung seed tanabuba - Elise aser Sabalenka nati 2019 U.S. Open

nung mezüing title angur aser Rod Laver Arena nung title pungobuba akoker alitsü.

Ajisüaka, Sabalenka-i kija asaya nung temulung agütsütsü tebilemba lir asünung, 2021 atema tanüingba Grand Slam nung tena külemi masayatsü.

"Ni kija asaya nungang temulung agütsütsü merangdar," ta Sabalenka-i ashi.

Ajisüaka, Dubai aser Miami nung taruba WTA asayamung nungbo küna külemi asayatsü,

ta lai shisem.

"Tarep asaya kangarabo tasak masü, kija asaya ama tarep nungbo kanga anibeleva asayatsü madoker. Asayatsü tashi kanga nungdaker asünung, kija asaya nungang ni temulung agütsüner," ta single nung World no 7 Sabalenka-i ashi.

Tetsür kija nung world no 16 - Belgium tsür Mertens aser Belarus tsür Sabalenka naprongla Australian Open tetsür kija asaya round pezübuba nung tsükadok.

## India vs England: 4buba Test nung Sam Curran masayatsü

**Chennai, Tsüklai/February 19, 2021 (Agencies):** Alima ajunga asüingba COVID-19 wara tenokdangba ajanga senzusenbongtsü timtem ajuruba asadanga, England aser India Test asaya pezübuba atema England nung all-rounder Sam Curran squad nung madentsü, ta Brehostibarnü England and Wales Cricket Board-i ashi.

Curran, shiba mezüing Test asaya ana nung shilem magidaktsü anisüngzükdaktsü, pa Test series pezübuba menepa Ahmedabad tonga arutsü renemer liasü, saka senzusenbongtsü tetsükdaktsü

jenti ajuruba ajanga limited-overs squad nungang shilem agitsü menepa arutsü sentong lir. Ahmedabad nung Test asaya pezübuba ya March 4, 2021 nungi tenzüka asayatsü.

Ano külen, renemba ama aruya aliba Test tasembuba temer sülen, Chris Woakes-i squad toktsütsü; aser Curran melen squad nung tanga asayar ka yakta shimoktsü imlaa atar.

"Surrey club nungi all-rounder Curran ya Test series pezübuba menepa Ahmedabad tonga arutsü sentong renemer liasü. Ajisüaka, tang ama coronavirus tensa

t a m a j u n g d a n g senzusenbongtsü atema tetsükdaktsü jenti ajuruba ajanga Test pezübuba menepa pa (Curran) marutettsüsa akümer," ta ECB-i ashi.

Jonny Bairstow, shiba Curran aser Mark Wood na den Sri Lanka Test nung shilem magii, par asempronlga India aser England Test tasembuba nung asayatsü terenemba lir. Tawa, Sri Lanka-i 2-0 agi England madak Test asayamung kokogo. India aser England na Test tasembuba ya February 24, 2021 nungi Ahmedabad nung asayatsü. Iba asaya 'day-night' alitsü.

## Women's Euro 2022 atema Spain qualify süogo

**Baku, Tsüklai/February 19, 2021 (Agencies):** Women's Euro 2022 football asayamung nung jenjang ka ajangzuktettsü atema Spain tetsür team-i goal 13 agi Azerbaijan tsükdaktsüogo. Spain team atema forward asayar Esther Gonzalez aser Jennifer Hermoso nati goal pungongo idaktsü.

ASK Arena Group D qualifying asaya nung Levante striker Esther-i minute 21buba aser minute 31buba tsüingda goal pezü tashi atonga idaktsü aser iba mapang nungi Jorge Vilda'er telok - Spain-i asaya

amokbangadok.

Mezüing half atongtsü lia Hermoso-i goal ana idakja tesemdang team - Spain goal 6-0 agi Azerbaijan tejakdang ser tembang.

Tanabuba half nung, Mariona Caldentey, Eva Navarro aser Nerea Eizaguirre nungeri Spain atema goal ka ka idaktsü; aser iba asaya atemtsü minute 3 anünga lia Esther-i ano goal ka bendenloktsü.

Esther-i iba goal meinoktsüdang, asaya tanabuba half nung Hermoso-isa goal asem tashi idaktsü. Iba asaya

nung Hermoso-i goal pungo idaktsüba densema tongtibang football asaya balala nungi lai goal 42 tashi idaktsüogo, koba Spain tsür football asayar rongnung lai goal timtiba idaktsür alitsü.

Sangküm England nung final asayatsü atema Spain-i jenjang ka ngutetogo.

Women's Euro asayamung taküm asayatsü renem, saka Covid-19 wara süshia maoba ajanga ita 12 tashi atsülangtsü. Tang, iba asayamung July 6 nungi 31, 2022 tashi ayonga asayatsü renema lir.

## Australian Open: Daniil Medvedev final-i iogo

**Melbourne, Tsüklai/February 19, 2021 (Agencies):** Hokolbarnü, Australian Open tebur kija Semi-final asaya tatembuba nung, Russia nung Daniil Medvedev-i Stefanos Tsitsipas tsükdakja asayamung final tongtetogo.

Tan asayamung nung title tukububa takok angutsü asoshi meranga asayasang Novak Djokovic-a final-i iogo aser Danil o Djokovic na tsüingda final asayatsü terenemba lir.

Rod Laver Arena nung iba asayamung tatembuba semi-final asaya nung seed pezübuba Daniil-i 6-4, 6-2, 7-5 agi Greek nung Tsitsipas tsükdaktsü. Terepranger 7,000 dak tema matsüingdang asayar ana tsüingda semi-final asaya liasü aser iba Australian Open nung Daniil-i asaya 20 tashi akoker alitsü.

Arishi küm 25 tain Danil-i tan asayamung nung takok ngua asaya aruba den külemi title asem tashi kokogo aser taküm Australian Open kokra

pai mezüing Grand Slam takok angur alitsü.

Daniil-i iba Grand Slam title angutsü atema, Deobarnü pai top seed Djokovic akoktsüla. Taoba Australian Open - Melbourne Park nung Djokovic-i 8ben tashi final kokdanga lir.

2020 November ita nungi asaya balala den Medvedev-i takok ngua asaya arudar, iba den külemi pai tasa tajung amshia tejangraba tulu nung shilem agir. Ano külen, 17ben tashi Grand Slam takok angusang Serbia nung Djokovic den Daniil-i tesüsa asaya pezü nung toktepogo, kong Daniil-i asaya asem tashi koka lir.

"Iba asaya tasak liasü. Semi-final ka asünung, set tasembuba nung ni teraka arendaka asaya, saka iba asaya koktetba atema pelar," ta Medvedev-i ashi.

Yevgeny Kafelnikov aser Marat Safin sülen Australian Open final tongteter Russia nung rongnung Danil Medvedev tasembuba alitsü.

## Europa League: Arsenal aser Benfica na draw asü

**Rome, Tsüklai/February 19, 2021 (Agencies):** Brehostibarnü, Arsenal aser Benfica na tsüingda Europa League last-32 tie indang mezüing leg asaya goal 1-1 draw nung tembang. Arsenal atema Bukayo Saka-i goal ka idaktsü.

Iba asaya mezüing half nung telok kati danga goal meinoktsüteti tembang. Ajisüaka, tanabuba half tenzüker minute 55buba nung, Pizzi indang penalty goal ka ajanga Benfica goal 1-0 agi tejakdang akümba sülen Bukayo-i minute 57buba nung goal ka idakja telok ana tsüingda goal 1-1 kasa kümadok.

Portugal aser UK tsüingda COVID-19 dak sendakba nung senzusenbongtsü tenokdangba ajanga Benfica atema Rome indang Stadio Olimpico nung iba asaya ayongzük. Iba asaya nung Arsenal-i goal timba idaktsütsü maongka angu, saka goal meinoktsüteti draw nungang tembang.

Saka-i ano goal tanabuba idaktsütsu maongka angu. Kasa mapang külem team pur Pierre-Emerick Aubameyang-

a pa mekümdangba ajanga ishíbenka goal idaktsütsü maongka tepdok.

Taruba hopta team anaprongla leg tanabuba nung teimla tulu yur asayatsü terenemba lir. Leg tanabuba ya Athens yimti nung ayonga asayatsü.

Arsenal-i mezüing half amokbanga asaya aser goal 1-0 agi Benfica tejakdang ser asayatsü maongka angu, kong Hector Bellerin teyari ajanga Aubameyang-i goal inoktsütsü merangdang, saka pai goal post adena ball metsüdok.

Tanabuba half tenzüker Diogo Goncalves-i metsüba cross ball ka Arsenal nungi Emile Smith-Rowe teka nung ondakba ajanga Benfica-i penalty ka metsütsü maongka ngua minute 55buba nung Pizzi-i iba penalty idaktsü.

Tatsüka dang lir, Arsenal-ia telangzüba tajung agüja Martin Odegaard teyari ajanga Saka-i goal ka idaktsü.

Aubameyang, shibai Premier League nung Leeds United den asayadang hat-trick goal idaktsü, pai Arsenal atema goal ana idaktsütsü maongka ngua liasü, saka goal anaprongla tezülen metsüdok.

## BILEMDANGANG

"Kodang tenükmerem lidir tepor tajung ajakji tamajung küma ngüdaktsür."